



UNIVERSITÄTS-
BIBLIOTHEK
PADERBORN

Universitätsbibliothek Paderborn

**Ven. Viri Thomæ Malleoli A Kempis, Canonici Regvlaris
Ordinis D. Avgvstini. Opera Omnia**

Thomas <von Kempen>

Dvaci, 1625

Vigesima-Qvarta. De merito Dominicæ passionis, & dignitate sanctæ
Crucis.

[urn:nbn:de:hbz:466:1-45790](https://nbn-resolving.org/urn:nbn:de:hbz:466:1-45790)

& sapè peccasti, & æternam pœnâ iustè meruisti. Videtur infir-
 mis mentibus, via crucis amara esse & grauis: sed finis eius lætus
 est & fructuosus, atque amantibus dulcis & salutaris. Nõne me-
 lius est modò, lugubrem & laboriosam ducere vitam pro Chri-
 sto & compati crucifixo; quàm post modicum corruptibilis vi-
 tæ gaudium, cum diabolo æternaliter cruciari in inferno? Tanto
 enim eris Deo acceptior, & ampliori gloria dignus in regno cæ-
 lesti; quanto pro nomine Iesu, grauiore nũc pertuleris dolores
 & labores: non respiciendo ad temporales cõsolationes, sed ad
 Christi passionem ac duras sanctorum vias, qui transferunt per-
 tribulationes multas. Trãsit velut vmbra citò omnis temporalis
 pœna & iniuria illata, sed permanet in cælo perennis mercedis
 gloria; quæ pro bona patientia in fine tibi reddetur, Christo an-
 nuẽte. Stude ergo viam sanctæ crucis tenere, & dolorosam ima-
 ginem crucifixi Iesu in corde portare, atque in fragili corpore
 pro posse viriliter imitari. Libenter temetipsum resigna, atque
 diuinæ voluntati omnia tua fidenter committe, qui tanta pro tua
 salute fecit & pertulit, quòd nunquam poteris ei, pro minimo
 puncto passionis suæ dignas gratias reddere, etiam si omnium
 sanctorum martyrum passiones & labores posses sustinere. Sed
 heu, quòd tam tepidè dominicam crucem sequeris: quòd non inten-
 tentiùs doloribus Christi compateris: quòd non feruẽtiùs illi
 seruis, & indefinenter gratias agis; qui tam charum te æstimauit,
 & præ cæteris creaturis dilexit, vt mori pro te non renueret, sed
 sua innocenti morte ab æterna morte liberaret. Fuisses enim æ-
 ternaliter condemnatus, nisi Christus pro te crucifixus fuisset &
 mortuus. Quis enim potuit pro omnibus peccatis hominum sa-
 tisfacere, nisi Iesus Christus, filius Dei, agnus immaculatus?

VIGESIMA-QUARTA.

De merito Dominicæ passionis, & dignitate sanctæ Crucis.

Galat. 6.

I. Nos autem gloriari oportet in Cruce Domini nostri Iesu Christi, in
 quo est salus, vita, & resurrectio nostra. Hæc verba in sancta
 Ecclesia de sancta cruce leguntur & cantantur, in quibus meritũ
 dominicæ passionis commendatur; quæ omnibus sacrificijs le-
 galibus, & omnibus laboribus ac virtutibus sanctorum, dignissi-
 mè præfertur. Nã in passione & cruce Christi, vera salus nostra
 & redemptio humani generis plenissimè cõstat; per quam Chri-
 stus nos redemit, & pro peccatis nostris Deo Patri satisfecit, &
 paradysum nobis deuicta morte reserauit. Hoc pater in latrone
 pendente in cruce, cui dictum est: *Hodie mecum eris in paradiso*. O
 mira

Luca 23.

mira Dei clementia! O suauissima responsio! O salutaris crucis benedictio, quæ latronem ab omni reatu absoluit, & inter Christianos, ipsum priorem in paradysum introduxit!

2. Dicat ergo grates Christo omnes fideles, signo sanctæ crucis signati, Christi sanguine loti & mandati, Christi passione redempti, Christi morte viuificati, Christi vulneribus lanati, Christi doloribus mitigati, Christi opprobrijs honorificati. Dicant omnes, dicant singuli deuoto corde & ore confono, ad honorẽ crucifixi, ad confusionem diaboli, ad exaltationem sanctæ crucis, ad consequendam spem æternæ salutis, ad habendam firmam fiduciam in hora mortis: dicant, legant, cantent, resonent, cogitent & ruminent verba suauissima, & verè sanctissima, atque luper omnia aromata Deo gratissima. *Nos autem gloriari oportet in cruce Domini nostri Iesu Christi.* Galat. 6.

3. Felix anima, cui ad cor transfit acerbissima passio Christi; & in illa quotidie se exercet, meditâdo, legẽdo, orando. Beata, quæ crucem suam tollit, omnibus terrenis renuntiando; & quicquid aduersitatis sibi intus, vel foris occurrit, hoc totum patienter pro Christo sustinet & tacet. Nam hoc est gloriari in cruce, propter Christum in tribulatione gaudere, à delictis carnis abstinere, honores fugere, propriam voluntatem relinquere, & vsque ad mortem humiliter obedire. Hæc agere, est Christum per crucem imitari, & veraciter eum amare. In hoc enim Christus cognoscit, quis ad eum pertinet, & quis eum amplius diligit: si non sola cogitatione, sed quotidiana mortificatione, passioni eius se nititur conformare.

4. Et ad hæc quis idoneus? Putas inuenietur aliquis crucem tollere paratus? Magnum & profundum mysterium verbum crucis, quod non capiunt omnes; imò quàm plurimi abhorrent & fugiunt crucem, ipsa tamẽ ducit in vitam æternam. O verè beata crux, quantam habes intus dulcedinem: & quàm magnam efficaciam præstas contra omnium vitiorum languorem & cordis dolorem! O lignum vitæ preciosum, decorum, saluiferum, & super omnia ligna paradisi benedictum: honorandum ab Angelis, adorandum ab hominibus, osculandum labijs deuotis, amplexandumque brachijs extensis! Propter te facti sumus liberi & Deo reconciliati, qui eramus natura filij iræ & serui damnati. Propter te venit gaudium in mundum, tristitia & luctus in infernum. Tu salus credentium, gloria Apostolorum, clypeus martyrum, laus confessorum, diadema virginum, solamen viduarum, fortitudo senum, disciplina iuuenum, speculum religiosorum, refugium tribulatorum.

5. O crux splendidior astris, pulchrior luna, cæcidior sole; cæ-
lum

lum illustrans, tartarum penetrans, dæmones fugans; homines protegens, malos terrens, bonos lætificans, superbos deprimens, humiles exaltans! O crux gloriosa, signū mirabile, vexillū insuperabile, scutum impenetrabile! O dulce lignum, omni honore dignum! Tu regem cælorum portasti, & inter brachia tua Dei filium morientem sustentasti. Propter te omnia signa crucis, de quacunque materia facta, & in quocunque loco posita, in honore sunt & reuerentia. Tibi inclinant reges & principes, dominus & domicella, seruus & ancilla; diues & egenus, monachus & clericus, magister & discipulus; omnis ætas, omnis sexus fidelium te adorat, laudat, & benedicit propter Christum, qui in te pependit, & omnes redemit.

6. O crux benedicta! Per te namque omnia sacramēta Ecclesię benedicuntur, sacerdotes consecrantur; infirmi inunguntur, defuncti muniuntur; imagines sculpuntur, parietes pinguntur, altaria decorantur.

7. O crux speciosissima in corpore Christi dedicata, & ex membris eius tanquam margaritis ornata, rosę sanguine rubricata, clavis transfixa, profundo terrę infixā! Tu per quatuor mundi climata expandis tua cornua, omnia ad te trahens & amplectens, quę in cælo sunt & in terra.

8. O crux nobilissima, super omnia armorū genera fortissima, mundum vincens & dæmonia, ad nulla pauens mortis supplicia! Tu in omni angustia & necessitate, tam in vita quam in morte, iuuamen es tutissimum & solatium singulare.

9. O crux amantissima, à Christo præelecta, atque in humeris eius ad locum Caluarie baiulata, nec ante mortem ab ipso separata: iuxta quā stabat mater Iesu Maria dolore plena cū dilecto discipulo Ioāne & pia Magdalena! Obsecro te, assiste mihi, & protege me semper hęc & vbique, die ac nocte: ne præualeat contra me inimicus malignus insidiator animarū, sed sacrosancto potentie tuę signaculo me defende & corrobora: quatenus in fide recta, spe firma, atque charitate perfecta perseverem, propter eum qui mortuus est in te propter me.

10. O crux virtuosissima, & omni honore dignissima! Ecce ante te tremunt impia tartara: sub tua quoque potestate curuatur imperia: tibi flectunt genua cęlestia & terrena. Nam in tua virtute sunt in multis locis signa & miracula, cedunt fulgura & tonitrua. In bellis quoque & locis obscuris, in periculis maris & aëris optima es custodia, & firmissima tutela.

11. O crux sanctissima, summè veneranda, dignè recolenda, intimè amanda, cordi inscribenda, fronti ac pectori imprimenda! Rogo piè, peto sedulo, adesto mihi in omni tribulatione mea.

Salua,

Salua, libera, benedic, sanctifica omnia membra mea; rege sensus meos, omnia verba mea & opera, quamdiu sum in hac vita. Ut per te me recipiat, qui per te me redemit, Iesus Christus Dominus meus pro me crucifixus.

12. O crux arbor salutifera, super omnes arbores eleuata! Tu cedro altior, cypresso redolentior; palma pulchrior, balsamo preciosior, oliua pinguior, vitæ facundior; ficu dulcior, buxo viridior, rosa rubicundior; omnibus aromatibus & speciebus salubrior; omnibus medicamentis & emplastris efficacior. Tu animas sanas & corpora. Tu dolores mitigas, & lachrymas consolaris. Tu spem miseris donas, & iustis præmia spondes. Tu pœnitentibus veniam præbes, & omnibus ad te confugientibus gratiam & misericordiam impendis. Tu largam benedictionem deuotis infundis, errantibus lumen aperis, corda compungis; & cunctis per orbem fidelibus consolationis oleum ferre non cessas: & vsque in finem seculi, fructum æternæ vitæ germinare non cessabis: per virtutem Domini nostri Iesu Christi, pro salute mundi crucifixi.

13. O crux dulcissima, fronde latissima, flore vernantissima, fructu fertilissima! Tu primatū tenes & dignitatē, super omnes imagines sacram passionem Christi repræsentantes, vbicumque fuerit nomen Christi auditum vel prædicatum. Ideoque propter reuerentiam diuinæ potentie in te latētis, dignè ab omnibus adoraris, coleris, & honoraris. Tu in Ecclesijs & capellis, in claustris & castellis, in vrbibus & villis, in portis & ianuis, in parietibus & fenestris, in turribus & tectis, in pauimentis & sepulchris, in altaribus & laquearijs, in casulis & stolis, in cappis & mantellis, in frenis & vexillis, in libris & chartulis, in tabulis & scabellis, in cameris & cellis, in varijs ædificijs & picturis, signaculum virtutis tuæ imprimis & inscribis. Tu etiā auro & argento, gemmis & lapidibus preciosis, decenter adornaris. Tu purpura & bysso, syndone & serico, floribus & rosis, reuerenter circumponeris & inuestiris, propter insignem redemptoris nostri imaginem in te triumphantis & pendentis. Hæc omnia deuota obsequia tibi à fidelibus dignè exhibentur, pro eo quòd magnam confusionem & derisionem in passione Christi à perfidis Iudejs sustinuisti. Iustum igitur est, o bona & sancta crux, ut sis sociā honoris & exaltationis, quæ fuisti particeps confusionis & mœroris. Nemo tamen mortalium sufficientem laudem & honorem poterit dignitati tuæ exhibere, etiamsi omnium Angelorum virtutibus emerneret, aut sanctorum miraculis coruscaret. Omnis laus & honor inferior est; & longè minor in verbis, quàm dignitas tua requirit. Quia ex beneficijs Christi nobis copiosè collatis, & ex tua per-

seueran-

feuerantia adhaesione in mortis articulo cum Christo, ampliora tibi laudem praecordia iure debentur.

14. In hoc maximè fidelitas amicitiae cognoscitur, cum quis amico suo in vltima necessitate astat, & condolet, & obsequitur, & vsque ad vitae exitum, indiuiduus comes perseverat. Ita certè egisti, o fidelissima crux, cum Salvatore Domino nostro Iesu Christo, qui te primùm in humeris suis patienter portauit, & tu versa vice, creatorem tuum dignanter inter brachia tua accepisti. Sed nec ipsum amatorem tuum finaliter reliquisti, à quo tam clementer amplexata es, & longè deportata. Vnde & veris Christicolis & cruciferis speculum tolerantiae in castigatione carnis es effecta: sed & omnium laborum victricem & aeternorum praemiorum donatricem, te laudant crucis amatores: sicut in B. Petro Apostolo & S. Andrea clarè satis apparet, qui ambo per crucem ad Christum peruenierunt.

15. O nimium felix, & super omnia deuota solatia, crux amanda, semper in mente habenda, semper oculis aspicienda! Tu reclinatorium sancti sanctorum, qui cum non haberet, vbi caput suum dolens & infirmum reclinaret, tu puluinar eius extitisti. Tu lectulus vlcerosi dorsi Saluatoris nostri, nõ mollis nec floridus, sed rigidus, asper & nimis angustus. Tu neminem tecum morari, nec quiescere, nec appodiare inter brachia tua permisisti: nec sanctum deificum corpus Iesu de virgine natum, à quo in diuersis locis precioso sanguine eius meruisti tangi, aspergi, & consecrari. Tu scabellum sanctorum pedum filij Dei, in agone constituti. Tu altare summi sacerdotis, in quo Christus semetipsum obtulit pro peccatis nostris, hostiam Deo in odorem suauitatis. Tu arca federis Domini, continens conditorem vtriusque Testamenti. Tu vna aurea, habens manna absconditum, verum corpus Christi pro nobis immolatum. Tu altissimi regis gazophylacium, caelestibus thesauris plenum: in quo continentur sacratissimae reliquiae totius orbis terrae, corpus scilicet dominicum, clauis crucentis, spinea corona, & omnia vulnera preciosa.

16. O crux verè sancta, quàm magnificè meruisti à Deo decorari, ditari & honorari! Nam tantis bonis ac reliquijs sanctis adornaris, vt nulla arca, nulla apotheca, nulla aula regia, nulla domus eburnea, nulla colūna marmorea, tuae dignitati sit comparanda. Meritò ergo & iuste, tota deuotione omnis terra adoret te, & psallat tibi, psalmum dicat nomini tuo in seculum seculi, ad honorem crucifixi. Legat itaque, & ruminet frequenter omnis anima fidelis verba de sancta cruce scripta: & dicat cum B. Paulo Apostolo, & tota sancta Ecclesia: *Nos autem gloriari oportet in cruce Domini nostri Iesu Christi: in quo est salus, vita, & resurrectio nostra.* Amen.

Galat. 6.

VIGÈ-